

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. PHED Minister Prof. Lalnilawma chuan nimin khan Lunglei khawpui tui lakna, Greater Lunglei Water Supply Scheme (GLWSS) hmun Pialthleng leh Tlawng lui a tlawh.
2. Krismas leh Kum thar vuakvetah, kum danga lo tih thin tawh angn kuminah pawh Lirthei tlan phal lohna hun leh hmun 'No Vehicle Zone' siam a ni leh dawn.
3. Microsoft chuan Asia-a an sumdawna lian ber ni turin dollar tluklehdingawn 17.5 hu AI lama sumdawna India ah an bun dawn.
4. President Draupadi Murmu-i chuan nimin khan Shilp Guru Award 2023 leh 2024 atan mi 12 hnenah hlan.



**PHE MINISTER**

Public Health Engineering Department (PHED) Minister Prof. Lalnilawma chuan nimin khan Lunglei khawpui tui lakna, Greater Lunglei Water Supply Scheme (GLWSS) hmun Pialthleng leh Tlawng lui tlawhin, Lunglei khawpuiin tui hnianghnar zawk a hmuh theih nana AMRUT 2.0 leh SASCI hnuaiia GLWSS tihchangtlun hna thawh mek a enfiah.

PHED Minister Prof. Lalnilawma chuan GLWSS tihchangtlun hna thawh mek chu chak taka kalpui a nih theih nan department lam pawhin theih tawp an chhuah thu leh contractor-te pawh a tul anga an nawr reng thu a sawi a.

Minister chuan tuna hma lakna kal mek bakah, Lunglei tui lak tihchangtlun zelna turin scheme hrang hrang hnuaiia ruahmanna leh hmachhawp an neih thu tar langin, Tlawng tui khuah hna leh tui lak tihchangtlun hna thawh mekah LDCA leh MJA te'n an veipuaah lawm thu a sawi bawk.

Tuna Lunglei tui pump mekna – Greater Lunglei Water Supply Scheme hi kum 1995 November ni 22-ah hman tan niin, tunah hian kum 30-a upa a ni tawh a. Kum 2054 (kum 30 hnu) thlenga mihring 1,11,827 chawm thei tur, Tlawng leh Pialthleng lui atanga tui lakna tur ruahmanna, upgradation of GLWSS (pumping & distribution system) chu SASCI (Scheme for Special Assistance to States for Capital Investment) 2024-2025 sum cheng vaibelchhe 55.7 (₹ 55,70,00,000/-) senga hma lak mek niin, civil work hi PHED-in departmental work-a thawkin, hmanrua leh khawl mamawh erawh chu supplier hnen atanga lak a ni a.

He project-ah hian tui lakna main pipeline tihchangtlunna tur te, tui tihthianglimna leh sawngbawlna (water treatment plant) tihchangtlunna leh siam belhna tur te, pump house leh a khawl thar dah belhna tur te, tui sem darhna (distribution system) leh electrical sub-station tihchangtlunna tur te a tel a. Kum 3 chhunga zawh tura ruahman niin, GLWSS-a awm tawh sa – Treatment Plant leh Sedimentation Tank te siam that mek a ni.

**DIPR**



**CORPES TRANSPORTATION**

Mizoram sorkarin khualkhuua thite ruang phurh man a tumsakna, 'Assistance for Transportation of Bodies of Deceased Persons within Mizoram' kaltlangin ruang 1,613 phurhna man cheng nuai 167 point 81 pek a ni tawh.

Ruang phurh man buaipuitu Social Welfare department atanga Akashvani News Aizawl thudawn danin, ruang phurhna senso sorkarin a tumsakna hi nikum September thla khan hawn a ni a, December thla atangin ruang phurh man hi pek tan a ni.

Nikum September thla atanga nimin December ni 9 thleng hian Social Welfare department chuan ruang phurh man dilna 1,613 atan cheng nuai 167 point 81 an pe tawh a; Social Welfare department hotute chuan ruang phurh man dilna hi online hmanga tih theih turin portal siam a nih thu leh peihfel a nih tawh thu an sawi rualin, portal hi hman tura tlangzarh ala nih loh thu leh thawktute tan pawh portal hman dan training buatsaih a la nih dawn thu an sawi.

Mizoram sorkar chuan ruang phurhna senso tur hi kum 2024-25 leh 2025-26 atan budget-ah cheng nuai 500 ve ve a dah a; ruang phurh inkaihhraina in a tarlan danin, ruang phurh tur chu a thlenna tur km. 20 aia hna a ni tur a ni lo a, km. 20 piah lamah chuan tu tan pawh hman theih niin, lirthei thlen theih chin a huam a ni.

Inkaihhraina ang chuan, ruang phurhna lirthei hman man chu State Transport Authority in rate a siam anga kalpui a ni a; ruang phurhna man sorkarin a peksak hian lirthei pakhat chiaah a huam a, lirthei hman theihah hian cheng nuai 17 man chin chunglam lirthei a huam lo a ni.

Ruang phurhna hlat zawng chhut nan ruang chhuahna atanga a dahna hmun inkar hlat zawng lak tur a ni a; lirthei thlen lohna khua a nih chuan lirthei thlen theih tapna thleng a ni. Ruang phurhna chu kawng tawi thei ber hman tur a ni bawk.

(Corr : Johny)

<><><>

## **NO VEHICLE ZONE**

Krismas leh Kum thar vuakvetah, kum danga lo tih thin tawh angin kuminah pawh Lirthei tlan phal lohna hun leh hmun 'No Vehicle Zone' siam a ni leh dawn.

Mizoram Chief Secretary Pu Khilli Ram Meena hovin, nimin khan Core Committee on Traffic Management chu Chief Secretary Conference Hall, MINECO-ah an thukhawm a. Christmass vuakveta Aizawl khawpui chhunga lirthei tlandan tur ngaihtuah ho a ni.

Thutkhawmnaah hian Unified Transport Co-ordination Committee (UTCC) Chairman leh Municipal Commissioner, Aizawl Municipal Corporation (AMC) in thurawn a pek te chu pawm a ni.

Aizawl Traffic Superintendent of Police in thupek a lo chhuah tawh angin, Aizawl khawpui chhunga lirthei intlanchwakna tur kawngpui dungte chu thu leh awm hma chuan hman chhunzawm zel a ni ang.

Kumin December Ni 23, 24 leh 31 December chawhma dar 10:30 atanga tlai dar 4:30 hian Chanmari atanga Zodin Square thleng chu No Vehicle Zone a puan a ni ang.

(DIPR)

<><><>

## **MUHCS**

Mizoram sorkarin damlote chhawmdawlina atana healthcare scheme a duan Mizoram Universal Healthcare Scheme (MUHCS) hmangin damlo 55,483 enkawlina senso pek a ni tawh a; MUHCS kalpuitu damdawi-in hrang hrangte hnenah sorkarin damlo an enkawlina bill atan cheng vbc 86 point 65 a pe tawh a ni.

Mizoram State Healthcare Society (MSHCS) hotute atanga Akashvani News Aizawl thudawn danin, kumin April thlaa MUHCS kalpui anih atanga tun thla ni 3 thleng khan MUHCS kalpuitu damdawiin te hnenah MSHCS chuan damlo enkawlina senso rulh nan pawisa an pe tawh a, pawisa an pek tawh zawng zawng hi avaiin cheng vbc 86 point 65 niin, heng pawisa hi MUHCS kalpuina damdawi-in hrang hranga damlo 55,483-te enkawlina bill a ni.

Kumin July thla khan damlo 10,652 bill atan MUHCS kalpuitu damdawi-inte hnenah cheng vbc 14 point 96 pek niin bill pek tam ber thla a ni a; April thla khan damlo bill 1,548 atan cheng vbc 1 point 09 pek niin bill tlem ber tum a ni.

Mizoram chhungah MUHCS kalpuitu empanelled private hospital 13 leh empanelled private day care centre pathum a awm a; Aizawl district-ah MUHCS kalpuitu mimal damdawi-in 5 awmin a tam ber a, Lunglei district-ah damdawi-in 3 awmin, Champhai leh Lawngtlai district-ah damdawi-in 2 ve ve leh Siaha district-ah damdawi-in 1 a awm mek a ni.

MUHCS kalpuitu empanelled private day care centre pathum pawh hi Aizawl khawpuia mite an ni a; Mizoram pawnah MUHCS kalpuitu damdawi-in, empanelled hospital 25 leh deemed empanelled hospital 13 a awm mek bawk a ni.

(Corr : Johny)

<><><>

## **MPCC PRESS CONFERENCE**

MPCC thupuangtu Pu Lalbiakzama chuan Chief minister Pu Lalduhoma'n tun hnaia Saipuma Hmar Students Association inkhawmpui a hmanpuinaah thu belhchian dawl lo engemaw zat a sawi tih sawiin, thumuhnu kaitho zawng leh Mizote inkara rilru in tihnat sak thei zawnga belhchian dawl lem lo thusawi hi sim a tan a that thu a sawi.

Pu Lalbiakzama hian nimin khan Aizawl Press Club-ah chanchinbu mite kawmin, tun thla ni 5 khan Chief Minister Pu Lalduhoma'n Hmar Students Association inkhawmpui a hmanpuinaah kum 1991-92 chhoa HPC-te movement vanglai khan Saipum khua chu Saiphaiah tihluhna nen khawm tum nia a sawi chu thu belhchian dawn lo a nih thu sawiin, tih luihna ni loin a duh tan duhthlan theihna siam a nih thu leh sorkar khan rangva leh pawisa thlengin pek a in huam a, Saipum mai ni loin Sakawrdai lamahte pawh he rawtna hi siam a nih thu leh an mahni duhthlannain chhungkaw engemaw zat chu he rawtna ang hian an pemkhawm nia hriat a nih thu a sawi a ni.

HPC-D leh Mizoram sorkar inbiaknaah Chief Minister Pu Lalduhoma'n a mimal anga hma a lak thu a sawi chu mak an tih thu sawiin Pu Lalbiakzama chuan, HPC-D palaite khan Pu Lalmuanpuia Punte chu an spokesperson anga a tel ve phalsak tura an dil angin remtihsak an ni a, Pu Lalduhoma erawh a inrawlhna an hriat loh thu a sawi.

*(Byte - Pu Lalbiakzama)*

(Corr : Johny)

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## **MIZORAM SECONDARY SCHOOL GAMES**

School Education Department buatsaih - Mizoram Secondary School Games vawi 42-na chu nimin atang khan Aizawlah tan a ni a, December ni 12, Zirtawpni thleng a awng.

Tun tum Secondary School Games-ah hian Sports Discipline hrang hrang 6 - Athletics, Football, Volleyball, Taekwondo, Inkawibah, Kalchhet leh Inhrupawh-ah te zirlaite an inel dawn a, discipline hrang hrang hi hmun hrang hrangah ngah a ni a. District hrang hrang 11 atangin zirlai leh zirtirtu 1900 vel an tel a ni.

(Desk)

<><><>

## **MICROSOFT**

Microsoft chuan Asia-a an sumdawna lian ber ni turin dollar tluklehdingawn 17.5 hu AI lama sumdawna India ah an bun dawn. Prime Minister Narendra Modia chuan Microsoft sumdawna huang zauh tur chu lawmawm a tih thu a sawi a. India in Artificial Intelligence lama hma a hruaina chuan khawvel tan hma hun eng tak a siam a nia ti. Hetianga Microsoft in sumdawna lian tak an rawn nei tur chu thalai ten remchanna tha tak an lo nei thei dawn tih a sawi bawk a ni.

(NewsonAIR)

<><><>

## **PRESIDENT**

President Draupadi Murmu-i chuan nimin khan Shilp Guru Award 2023 leh 2024 atan mi 12 hnenah hlan.

Nimina New Delhi ah inkhawm buatsaihah kut themthiam lama thawk tha te hnenah Handicrafts Award hi sem a ni a.. He hunah hian kum 2023 leh 2024 chhunga handicrafts lama mi hmingthate chawimawina pek a ni. Thusawiin Pi Murmu-i chuan art chuan hnam hrang hrang a thlunzawm a ti a. Kut themthiamna thil chu hnam ziarang nihna mai niloin mipui nitin khawsakna thlentu pawimawh tak a ni a ti.

(Newsonair)

<><><>